

To'on yó'o kían nì taa San Pablo nì sa'an noó nà ndéi kuendá Galacia

Ká'an Pablo ndisá'an

1 ¹ Yu'u kúú Pablo, ta kúúí iin apóstol, nà né'e to'on Jesucristo. Ta kò kúú ta'on yu'u iin yoo nì tanda'á iin taa, o iin ra nì kaxi taa. Dá chí mií vá Jesucristo xí'ín tatá Ndios, nà nì daná'taki Jesús, kúú nà nì kaxi yu'u. ² Ta yu'u xí'ín ndidaá kà nà kúú kuendá Jesús ndéi xí'ín yó'o ká'an ndu ndisá'an xí'ín ndo'ó, nà kúú kuendá Jesús ndéi ñoo kuálí ñó'o chí kuendá Galacia xaan. ³ Ta mií tatá yo Ndios xí'ín sato'o yo Jesucristo ná kee na ña manì xí'ín ndó, ta nakì'o na ña koo va'a ini ndo. ⁴ Jesucristo kúú nà nì xì'o mií ná nì xì'i nà sa'á kuachi yo, dá nì taó xóo na yó tixi ndá'a ndidaá kúú ña kini ió ñayuu yó'o, chí kì'o dión nì chikaa ini tatá Ndios ña kee na xí'á. ⁵ Ta daá kuití kánian natiin na ñañó'ó. Dión ná koo.

Iin tó'on dinì vá Jesús kándéé iní yo, dá ndoo kuachi yo noo Ndios

⁶ Naá vá iniñi xiniñi sa'á ña yachi téi nì kasá'á ndó kankuei xoo ndó noo Ndios, nà nì kana ñaá sa'á ña manì nì kee Jesucristo sa'a ndo. Ta viti ká'an ndó ña ió iin kà to'on saá kì'o ña kaxi ndó. ⁷ Tído kò t'ón iin kà to'on saá kì'o ña kaxi yó. Ndéi dao taa tein mií ndó xaan, ta kátoó ra dátuu rá ndo'ó, ta kátoó ra nadaon ra to'on va'a ña ká'an sa'a Cristo. ⁸ Ta va'ará ndu'u o iin ángel nì kii induú ná dána'a iin kà to'on saá noó ña nì sa daná'a ndu noo ndo, dá kían iin íchi ná kandoo ndu kakomí ndú kuachi noo Ndios. ⁹ Ta sa nì ka'an ndu xí'ín ndó, ta nándió kuéi tuku ndu ká'an ndu xí'ín ndó; ndi ndáa taa díin dána'a o dúú to'on va'a nì daná'a ndu noo ndo, dá kían iin íchi ná kandoo ra kakuu ra taa kómí kuachi noo Ndios.

¹⁰ ¿Á ká'an ndó ña xí'ín to'on ká'in yó'o ndúkúí ña kandoo va'i noó ñayuu o noo Ndios? ¿Á ká'an ndó ña dión ká'in, dá kandoo va'i noó ñayuu? Chí tá ndúkú yu'u ña kandoo va'i noó ñayuu, dá kían kò kúú ta'on yu'u iin nà kéchóon noo Cristo.

Di'a nì kuu tá nì kana Jesús yu'u ña kane'i to'on na

¹¹ Kóni yu'u ña kana'á ndó, ñani mií, ña to'on va'a dána'a yu'u kò kúú ta'an vaan ña nì ndaki ini ñaxintóni taa. ¹² Dá chí kò ní nátiin ta'on yu'u to'on yó'o noo ni iin tó'on taa, ta ni iin tó'on taa kò ní dána'a ña nooí. Mií vá Jesucristo kúú nà nì xì'o to'on va'a yó'o nooí. ¹³ Sa nì ni'ì tó'on va ndó táto'on kì'o nì sa kee yu'u tá sa kandísai táto'on kándisa nà Israel. Sa ná'á vá ndó táto'on kì'o kini sa kendava'a yu'u xí'ín ñayuu kúú kuendá Jesús, chí sa katoóí dánaá ndi'i noo ná. ¹⁴ Ta yu'u nì sa kuu iin

ra sa ndíko cháá ka choon sa'ándá ta sá'ano ñooi o duú dao ka taa dáó xí'ín, chi ni sa ndi'i cháá ka inii sa keei choon sa'ándá ta sá'ano ñoo.

¹⁵ Tído mií Ndios ni kaxi yu'u nda rá ko ñá'a kakii, ta ni kana na yu'u sa'á ña kú'u ini na sa'í. Ta noón kúu na ni nata'an ini ¹⁶ na'a na de'e na nooi, dá ná dána'a yu'u noó na ko kúu na Israel. Ta ko ní sa'an ta'oin ndato'in ni iin tó'on ñayuu ndí kían dána'i. ¹⁷ Ta ni ñoo Jerusalén ko ní sa'in ndato'in ta sa daá kúu apóstol noó yu'u sa'á ndi kee dána'i. Ña ni keei kían dinñó'ó ka ni sa'in chí kuendá Arabia di'a. Dá ni nandió koo tukui ñoo Damasco.

¹⁸ Tá ni ya'a oni kuia, dá ni keei kua'in ñoo Jerusalén, dá konii Pedro, ta kana'í na. Tá ni saai noo ió na, dá ni sa ioi xí'ín ná sa'on va kuu.

¹⁹ Tído ko ta'ón dao ka na kúu apóstol ni xinii, sava'a iin tó'on Jacobo, na kúu ñani sato'o yo Jesús, kúu na ni xinii. ²⁰ Ta ná'á mií Ndios ña ko ká'an to'in noó ña táai kosaa noo ndo.

²¹ Tá ni ndi'i, dá ni sa'in chí kuendá Siria, xí'ín kuendá Cilicia di'a.

²² Ta na kúu kuendá Jesucristo ndei chí kuendá Judea ko ná'á ta'on na yu'u tiempo daá. ²³ Sava'a ña ni seídó'o na sa'a yú'u kúu ña: “Taa kaa kúu taa sa kendava'a xí'ín yó tá sata, tído viti xionoo ra kásto'on ra xí'ín ñayuu to'on va'a sa'a Jesús, tá'an ña sa katoó ra dánaá ra tá sata.” ²⁴ Ta ni keká'ano na Ndios sa'á ña ni kee na xí'ín.

Di'a ni kuu tá ni sa'in ñoo Jerusalén, ni ka'in xí'ín na kúu apóstol

2 ¹ Tá ni ya'a uxi komi kuia, dá ni nandió koo tukui ñoo Jerusalén xí'ín Bernabé. Ta ndáka ta'anii Tito ni sa'in. ² Chi mií Ndios ni xi'o ña ni kandaá inii ña kánian ko'in ñoo. Ta sa'á ña ko kónii ña naá óon choon keei, sa'á ñoo ni nakanii xí'ín sava'a na ndíta noó na kúu kuendá Jesús sa'a ndí kían dána'i noó na ko kúu na Israel. ³ Ta ni nata'an va ini na, sa'á ñoo ko ní kéndusa na ña ta'anda ñii Tito, ta ni sa ió dáó xí'ín, va'ará kúu rá iin taa griego. ⁴ Ta ni ku'u de'é ta'ani dao ra kaá kúu kuendá Jesús tein ndu'u kanani ñaá rá, ná kande'á ndí kían kée ndu sa'á ña ni kankuei xoo ndu tixi ndá'a ley Moisés sa'á ña ndíta ndu xí'ín Cristo Jesús. Chi kóni ra ña kaño'o jí ndú tixi ndá'a ley Moisés. ⁵ Tído ni lú'u ví ko ní sónó ndu'u noo rá ña kee ndu ña kóni ra, dá kían ná kandita ndaa ii ní ndó noó to'on ndaa ña ká'an sa'a Jesús.

⁶ Tído ni iin ka to'on saá ko ní ka'an na ndíta noó na kúu kuendá Jesús xí'ín. Taa ndaya'i kúu ná, tído ko né'e tandíni, dá chi ni iin tó'on ñayuu ko máni cháá ka noo Ndios o duú dao ka na. Iin nóo vá kúu ndidaá ñayuu noo Ndios. ⁷ Ta di'a ni nakoni va na ña mií Ndios ni xi'o choon nooi ña dána'i noó na ko kúu na Israel sa'á to'on va'a ña ká'an sa'a Jesús, táto'on ki'o ni xi'o Ndios choon noo Pedro ña dána'a na to'on va'a yó'o noó na Israel. ⁸ Ta mií Ndios, na ni kaxi Pedro ña kane'e na to'on va'a sa'a Jesús dána'a noó na Israel, noón ta'ani kúu na ni kaxi yu'u ña kane'i to'on va'a yó'o dána'i noó na ko kúu na Israel.

⁹ Ta ni nakoni Jacobo xí'in Cefas xí'in Juan, tá'an na ndíta noó na kúú kuendá Jesús, ña miían ndaa kuiti Ndios ni xi'o choon yó'o noói, chi ni tiin na ndá'í, xí'in ndá'a Bernabé, ña ná'a ña iin ni nduu ndu xí'in ná. Ta ni kandoo ndu xí'in ná ña ko'on ndu dána'a ndu noó na ko kúú na Israel, ta mií ná ko'on dána'a tein na Israel. ¹⁰ Sava'a ña ni xika na noó ndu kíán ña ná dá'a ni nandodó ndu chindeé ndú na kúnda'í ndéi ñoo Jerusalén. Ta sa ñoo kúú váán ndí'i iniij keei.

Di'a ni kuu tá ni danáni yu'u Pedro

¹¹ Tído tá ni kasaa Pedro ñoo Antioquía, dá ni danáni yu'u na, dá chi ña ni kee na ñoo kúú iin ña ko vá'a noo Ndios. ¹² Chi tá ko ñá'a kasaa dao ta ni tanda'a Jacobo, dá ni sasá'an Pedro xí'in na ko kúú na Israel. Tído tá ni ndi'i ni kasaa ta ñoo, dá ni kasá'a kúxoo va Pedro noó na ko kúú na Israel. Ta kúú ko ní sásá'an ka na xí'in ná, chi yu'ú na kée ra ká'an ña miían ndúsa ta'anda ñii ndidaá ta kúú kuendá Jesús. ¹³ Ta sa'á ña ni kee na dión, sa'á ñoo ni kúxoo ta'ani dao ka na Israel kuendá Jesús. Ta nda Bernabé ni kee ta'ani dión, chi ni kúxoo ta'ani na táto'on ki'o ni kee dao ka ta uu noo ñoo.

¹⁴ Tá ni xini yu'u ña ko kéndúsá'ano na táto'on ki'o dándáki to'on ndaa ña ká'an sa'a Jesús, dá ni kaaí xí'in Pedro noo ndidaá na kúú kuendá Jesús ni nataka ñoo: “Mií ní kúú iin ta Israel, tído kée ní táto'on ki'o kée na ko kúú na Israel, ta ko nákaa ka ní tixi ndá'a ley na Israel. Sa'á ñoo, ¿ndiva'a kéndúsa ní xí'in na ko kúú na Israel ña kee na choon sa'ándá ley na Israel, tá dáá?

¹⁵ “Mií yó kúú na Israel, chi ni kakió ñoo Israel. Ta ko kúú yó ñayuu tukú yá'a kée kuachi noo ley yo. ¹⁶ Ta ná'a yó ña ni iin tó'ón ñayuu o kúú kandoo vii noo Ndios sa'á ña kée na choon sa'ándá ley Moisés, chi sava'a sa'á ña kándéé iní na Jesucristo, sa'á ñoo kándoo vii ná noo Ndios. Chi sa'á ña kándísa yó Jesucristo, sa'á ñoo kándoo vii yo noo Ndios. Ta kíán sa'á ña kándéé iní yo iin tó'ón dini Jesucristo va, ta o duú sa'á ña kée yó choon sa'ándá ley. Chi ni iin tó'ón ñayuu o kúú kandoo vii noo Ndios sa'á ña kée na choon sa'ándá ley.

¹⁷ “Ta sa'á ña ndúkú yó kandoo vii yo noo Ndios sava'a sa'á ña kándéé iní yo Jesucristo, sa'á ñoo ká'an dao ñayuu ña kúú yó ñayuu kómí kuachi. Ta, ¿á ña yó'o kóni kaa ña Jesucristo kúú na xí'o ña ya'a yó kee yó kuachi? Koó, ko ta'ón dión kíán. ¹⁸ Dá chi tá ni nandió kuéi tuku yó kándéé iní yo ley, tá'an ña ni dankoo yó, dá kíán kakuu ij vá yó ñayuu kómí kuachi noo Ndios.

¹⁹ “Sa ni xi'i va yu'u noo ley Moisés, chi ko kándéé ka iní ña dákaí ñaá. Ta ni nataki yu'u noo ña kóni Ndios. ²⁰ Ta viti kíán kékuendái ña ni xi'i nduúí xí'in Jesucristo ndika cruz. Sa'á ñoo ko takí ka yu'u noo ña kóni miíí. Nda Cristo va kúú na nákaa nímaí dándáki na yu'u viti. Ta ndidaá ña kéei viti, kúú ña kéei sa'á ña kándéé iní Jesucristo, na kúú

de'e Ndios, na kú'u ini sa'í, ta ni naki'o na mií ná ña ni xi'i na sa'í. ²¹ Ta ni iin kuu ta'ón o dánkoo yu'u ña maní ni kee Ndios sa'í. Dá chi tá ná kandoo vii yo noo Ndios sa'á ña kée yó choon sa'ándá ley, dá kían ni naá óon va ña ni kee Cristo Jesús ni xi'i na ndika cruz sa'a yo, ní kúu.”

Ni natiin yó Espíritu i Ndios sa'á ña kándéé iní yo Jesús

3 ¹ Nandéé ka vían xixi ndo'ó, na Gálatas xaan. ¿Ndá yoo ni danaá iní ndo, dá o kándísa ka ndo ña ndaa sa'a Jesús? Chi sa tá'í ni nakani ndu'u xí'ín ndó sa'á ña ni kee Jesucristo ni xi'i na sa'a yo ndika cruz. ² Ta viti, ña kóni kandaá inii sa'a ndo kían, ¿á ni natiin ndó na kúu Espíritu i Ndios sa'á ña kée ndó choon sa'ándá ley o sa'á ña ni kándéé iní ndo Jesús tá ni seídó'o ndó to'on va'a sa'a ná? ³ Nandéé ka vían xixi ndó. Chi sa va'a va ni kasá'á kándéé iní ndo Jesús ni kee na kúu Espíritu i. Tído, ¿á ká'an ndó viti ña xí'ín ndéé míí ndó, dá kándéé ndó káki ndó? ⁴ ¿Á ni naá óon va ña ni ndo'o nío ndo sa'á ña kándéé iní ndo Jesucristo? Va'a nda'o tá ko ní naá óon ña ni ndo'o ndó. ⁵ Ni xi'o Ndios Espíritu i ná noo ndo, ta kée na ña'a ndato xí'ín ndó. ¿Á dión kée na xí'ín ndó sa'á ña kée ndó choon sa'ándá ley, ká'an ndó? Koó, chi kée na dión sa'á ña ni kándéé iní ndo Jesús tá ni seídó'o ndó to'on va'a sa'a ná.

Natiin ta'ani yó ña va'a ni kandoo Ndios ki'o na noo Abraham

⁶ Kana'á ndó ña sa'á ña ni kándéé iní Abraham Ndios, sa'á ñoó ni kandoo vii ná noo ná. ⁷ Sa'á ñoó kana'á ndó ña ndi ndaa míí ñayuu kándéé iní Ndios, noón kúu na ve'e míí Abraham. ⁸ Dá chi ká'an tuti i Ndios ña sa daá ni chikaa va ini Ndios ña dánkoo vii ná na ko kúu na Israel noo míí ná sa'á ña kándéé ini ñaá ná, chi di'a ni kaa na xí'ín Abraham: “Sa'a yo'ó ni'i ndidaá kúu ñayuu ndéi ñayuú yó'o ña va'a.” ⁹ Sa'á ñoó ndi ndaa míí vá ñayuu kándéé ini Jesús, noón kúu na natiin ña va'a xí'o Ndios, táto'on ki'o ni ndo'o Abraham sa'á ña ni kándísa na to'on ni ka'an Ndios xí'ín ná.

¹⁰ Ndi ndaa míí ñayuu ndúkú ña kandoo vii ná noo Ndios sa'á ña kée na choon sa'ándá ley Moisés, na yó'o kúu na tái chi'an noo Ndios. Dá chi di'a ká'an tuti i Ndios: “Ndidaá kúu na ko ní kándéé kee ndi ndi'i choon sa'ándá ley, na yó'o kúu na tái chi'an noo Ndios.” ¹¹ Sa'á ñoó kandaá ini yo ña ko íin ta'on kandoo vii noo Ndios sa'á ña kée na choon sa'ándá ley. Dá chi di'a ta'ani ká'an tuti i Ndios: “Na ni kandoo vii noo Ndios sa'á ña kándéé ini ñaá ná, noón kúu na kataki chíchí.” ¹² Tído diin va dándáki ña kúu ley noó ña kándéé iní yo Ndios, dá chi di'a ká'an tuti i Ndios: “Na kándéé kée ndi ndi'i kuií choon sa'ándá ley, noón kúu na ni'í ña kataki na keean.”

¹³ Ta Cristo Jesús kúu na ni taó xóo yó tixi ndá'a ley, tá'an ña ni datái chi'an ñaá noo Ndios. Chi ni xi'o na míí ná ni nakuio na ndidaá kúu chi'an sa'a yo, dá chi di'a kaá tuti i Ndios: “Ta ndi ndaa míí taa ná

karkaa ndika iin yíto, roón kúú ra táí chi'an." ¹⁴ Ta sa'á ña ni kee Cristo Jesús dión, sa'á ñoó kuu ni'i ta'ani na ko kúú na Israel ña va'a, tá'an ña ni kaa Ndios ki'o na noo Abraham. Ta sa'á ña kándéé iní yo Jesús, sa'á ñoó ni ni'i yo na kúú Espíritu ii Ndios táto'on ki'o ni kaa Ndios kee na xí'in yó.

Nda tá sa na'á, dá ni chikaa ini Ndios ña tanda'á ná Jesús kii na chiya'i na sa'á kuachi yo

¹⁵ Nani, ná ko'in ka'in sa'a iin taa ñayuu yó'o xí'in ndó, dá kanda ini ndo ña kóni ka'in xí'in ndó. Tá ni kava'a iin taa iin tuti ña ká'an táto'on ki'o kóni ra kee ra, dá ni kani ra sello noo tuti ra, dá kían ni iin tó'on ñayuu o kúu dátuu ná to'on ni taa ra, ta o kúu ta'on chi'i na cháa ka to'on noo ña ni taa ra.

¹⁶ Dión ta'ani ni kee Ndios, chi ni kaa na noo tuti ii ná ña ki'o na ña va'a noo Abraham, xí'in noo na ve'e na. Ta ko ní ka'an Ndios ki'o na ña va'a yó'o noo "ndidaá na ve'e na", chi ko ní ka'an na sa'á kuá'á ñayuu, dá chi ni ka'an na sa'a iin tó'on taa, chi di'a ni kaa Ndios xí'in Abraham: "Tein na ve'e yo'ó kana iin taa." Ta taa ñoó kúú Cristo Jesús. ¹⁷ Sa'á ñoó ká'in xí'in ndó ña tá sa na'á ni xi'o Ndios to'on na ña kee na táto'on ki'o ni kandoo na kee na xí'in Abraham. Dá ni ya'a komi ciento oko uxi kuia, dá ni xi'o na ley na noo Moisés. Sa'á ñoó o kúu ta'on dátuu ley yó'o to'on ni xi'o Ndios noo Abraham, dá chi miían ndaa kee Ndios ña ni kandoo na kee na. ¹⁸ Chi tá ni'i yo ña va'a yó'o noo Ndios sa'á ña kée yó choon sa'ándá ley, dá kían ko ndaya'i ta'on to'on ni xi'o na noo Abraham. Tído ko ta'on dión kían, dá chi ni xi'o oon va na ña va'a yó'o noo Abraham, chi ki'o dión ni kandoo Ndios kee na xí'in ná.

Yó'o ná kani Pablo sa'a ndá choon ni xi'o Ndios ley na noo Moisés

¹⁹ Ta viti, ¿ndá choon ni xi'o Ndios ley na noo Moisés, tá dáá? Ni xi'o naan noo Moisés dá chi va'an dána'aan ndi ndaa iin rá iin ña'a kini kée yó. Ta ni daná'aan noo ñayuu nda rá ni tuu noo na ni kii tein na ve'e Abraham. Noón kúú ña va'a ni kaa Ndios ki'o na. Ta ni xi'o Ndios ley yó'o noo Moisés xí'in ndá'a ángel. Ta xí'in ndá'a Moisés ni xi'o naan noo ñayuu. ²⁰ Tído ko ní kéchóon ta'on Ndios iin ka ñayuu, dá ka'an na xí'in Abraham, chi iin tó'on míí vá Ndios ni ka'an xí'in ná.

²¹ Sa'á ñoó, ¿á dátuu ley Moisés ña va'a ni kaa Ndios kee na xí'in Abraham? Koó, ko ta'on dión kían. Dá chi tá kandeé ley ki'o ña kataki chíchí yó, dá kían xí'in míí vá ley kuu kandoo vii yo noo Ndios. ²² Tído ko ta'on dión kían, dá chi ká'an tuti ii Ndios ña ñó'o ndidaá ñayuu tixi nda'á kuachi, sa'á ñoó ki'o Ndios ña ni ka'an na ki'o na noo yo sava'a sa'á ña kándéé iní yo Jesucristo, chi sava'a ñayuu kándísa ñaá kuu ni'i ñá.

²³ Tá kō ñá'a kandeé iní yō Jesucristo, dá nī sá ndadi yō tixi ndá'a ley. Ta sá dandáki ñáá ley nda rá nī kasandaá kuu nī na'a Ndios noo yō ña kandeé iní yō Jesús. ²⁴ Ta ley ñoó nī sá ndakaan yó tát'on kī'o ndáka iin na kéchóon takuálí de'e sato'o na. Ta dión nī sá ndaka ley ñoó yó nda nī kasandaá yō kandeé iní yō Cristo Jesús, sa'á ñoó kándoo vii yō noo Ndios sa'á ña kándéé iní yō ná. ²⁵ Tído viti kándéé iní yō Jesús, ta nī kankuei yó tixi ndá'a ley, ña kúú tát'on kī'o kúú na ndáka takuálí, ²⁶ chí viti kúú yó de'e Ndios sa'á ña kándéé iní yō Cristo Jesús. ²⁷ Iin nī nduu va yó xí'ín Cristo sa'á ña nī sodo ndúta yō ña nī kandeé iní yō ná. Tá kíán tát'on kī'o nī nandixi yó na. ²⁸ Ta viti kō né'e tandíni á kúú yó na Israel o na griego, o á kúú yó na ñó'o tixi ndá'a iin sato'o o koó, o á kúú yó ta o ñá'a, chí iin tó'ón dinī nī nduu ndidaá yó noo Ndios sa'á ña kándéé iní yō Cristo Jesús. ²⁹ Ta sa'á ña kándéé iní yō Cristo Jesús, sa'á ñoó nī nduu yó na ve'e Abraham, ta ni'i yō ña va'a nī kaa Ndios kī'o na noó na ve'e Abraham.

4 ¹ Ta di'a kua'an ña kónii ka'in xí'ín ndó. Sa ná'á vá ndó ña iin tayíí ló'o, tá'an ra ni'i ndidaá kúú ñá'a tatá xi, iin nóó vá kúú xí xí'ín iin mozo, va'ará kakuu xi sato'o ndidaá ñá'a na ve'e xi. ² Dá chí nákaa xi tixi ndá'a na kéchóon noo tatá xi xí'ín na ndáka ñáá nda ná xino xi kuia ña kíán nī kaa tatá xi natiin xi ñá'a ió noo ná. ³ Kī'o dión ta'ani nī sá ndo'o yó, chí nī sá kuu yó tát'on takuálí ndó'o dión, chí nī sá ño'o yó tixi ndá'a ña kini dándáki ñayuu ndéi ñayuú yó'o. ⁴ Tído tá nī xinkoo tiempo ña kíán nī chíkaa ini mií Ndios, dá nī tanda'á ná de'e na Jesús nī kii na nī kaki na tixi iin ñá'a. Ta nī kaki ta'ani na tixi ndá'a ley.

⁵ Dión nī kee na, dá nī taó xoo na yó tixi ndá'a ley, dá ni'i yō ña kakuu yó de'e na. ⁶ Ta sa'á ña kúú yó de'e Ndios, sa'á ñoó nī tanda'á ná Espíritu de'e na nī kasáa na ió na ini nío yō. Ta Espíritu ñoó kúú na kédaá xí'á, dá kayu'ú yó Ndios: “Tatá ló'o mií.” ⁷ Sa'á ñoó kō ñó'o ka yō tixi ndá'a ley, chí ndáa de'e Ndios vá kúú yó viti. Ta sa'á ña kúú yó de'e na, sa'á ñoó kánian natiin yó ña va'a noo ná sa'a Cristo.

Kandita ndaa ndo xí'ín ña kándisa ndó sa'a Jesús

⁸ Tá sá na'á, ta kō ñá'a kana'á ndó Ndios, dá nī sá ño'o ndó tixi nda'á ña kō kúú ndios. ⁹ Tído viti sá ná'á vá ndó ndá yoo kúú Ndios, o va'a kaan ná ka'in xí'ín ndó ña sá ná'á di'a va Ndios ndo'ó. Sa'á ñoó, ¿ndiva'a nī nandió kuéi tuku ndó noó ñá'a kō chóon, tá'an ña kini dándáki ñayuu ndéi ñayuú yó'o? Ta, ¿ndiva'a nī nachi'i tuku ndó mií ndó tixi ndá'an? ¹⁰ Chí kéká'ano ndó dao kuu, xí'ín dao yoo, xí'ín dao víko xí'ín dao kuia. ¹¹ Sa'á ñoó nákanī ini sa'á ña kée ndó dión, dá chí ndá ndi kuu naá óon va choon nī kee tein ndó.

¹² Ñani mií, seí nda'ávii noo ndo ña kee ndó tát'on kée mií, dá chí nī kee yu'u tát'on kée mií ndó tá nī sá ioi xí'ín ndó. Ta ni iin ñá'a kō ní ya'a ndó nooí. ¹³ Ta sá ná'á vá míí ndó ña sa'á ña sa kú'u vai, sa'á ñoó nī

kuu ni daná'i noo ndo ta'ándá míi noo sa'á ña kúú to'on va'a ña ká'an sa'a Jesús. ¹⁴ Ta ko ní kú'ichí ini ndo koni ndo yu'u, ta ko ní káñó'ó ñaá ndó va'ará ni sa kú'i. Di'a ni ñakuaka va'a ndó yu'u táto'on iin ángel ni kii noo Ndios, ta ni kee ndó yu'u kúúí táto'on mií Cristo Jesús. ¹⁵ Ta, ¿ndeí kua'an ña kádijí tée iní ndo koni ndo yu'u? Ta xí'o ndaaí kuendá sa'a ndo, chí nda nduchí nóó ví ndó kú'u ini ndo taó ndo kí'o ndó noo yú'u tiempo daá ñóó, ní kúu. ¹⁶ Ta viti, ¿á ndaaí xiní u'u va ndó yu'u sa'á ña ká'in ña ndaaí xí'in ndó?

¹⁷ Ta ndéi dao taa kádí'inda rá ndo'ó, chí kátoó ra ña kee ndó ña kóni mií rá, tído o duú ña va'a kían kóni ra. Dá chí ña kóni ra kían taó xóo ra ndo'ó tein ndu'u, dá nduu ndó kuendá mií rá, dá koo kuión ndo xí'in ña dána'a ra. ¹⁸ Ña va'a kían tá daá kuití ná koo kuión ndo xí'in ña va'a, va'ará koó yu'u ió xí'in ndó.

¹⁹ De'e kuálí mií, tuku va ni kasá'á ndó'o naní níyo yu'u kée ndó, chí ndó'i táto'on kí'o ndó'o iin ñá'a tá káki de'án. Ta kúú dión kando'o vai sa'a ndo nda ná kasandaá ndo kee ndó to'on kí'o ni sa kee mií Cristo.

²⁰ Kóni kíij kakaají tein ndó, dá ka'in iin to'on vitá cháá ka xí'in ndó, chí nákaní nda'o ini sa'a ndo.

Ña yó'o kían ni ndo'o Agar xí'in Sara

²¹ Ta viti ká'in xí'in ndo'ó, na kátoó ndu'u tuku tixi ndá'a ley Moisés: ¿á ko óon ta'on kueídó'o ndó ndi kaá ley ni taa Moisés? ²² Chí kaá to'on ni taa na ña ni sa ndei uu de'e yíí Abraham. Iin xi ni sa kuu de'e ñá'a sa káa tixi ndá'a ñadi'í na. Ta iin ka de'e na ni sa kuu de'e ñadi'í na, ñá'a dándáki mií. ²³ Ta de'e ñá'a, ña sa káa tixi ndá'a ñadi'í na, ni kaki xi chí kí'o dión kóni Abraham. Tído de'e ñadi'í na, ñá'a dándáki mií, kúú ra ni kaki táto'on ni xí'o mií Ndios to'on na noo Abraham.

²⁴ Ndi nduú ñá'a yó'o kúú táto'on uu to'on ni kandoo Ndios kee na xí'in ñayuu na. Ta to'on mií noo kúú ley ni xí'o Ndios diní yúku naní Sinaí. Ta ñayuu ni kaki tixi ley yó'o, noón kúú na ñó'o tixi ndá'an. Ta ley yó'o kúú táto'on Agar, ta ñayuu ñó'o tixi ndá'a ley kúú táto'on de'e Agar. ²⁵ Dá chí ñá'a naní Agar ñóó kúú táto'on yúku naní Sinaí iin chí Arabia noo ni xí'o Ndios ley noo Moisés. Ta kúú ta'anián táto'on ñoo Jerusalén, ña nákaa viti. Dá chí ñoo yó'o nákaa tixi ndá'a ley xí'in ndidaá ñayuu ndéi nooán, táto'on kí'o ni sa káa Agar tixi ndá'a ñadi'í Abraham. ²⁶ Tído iin ka ñoo Jerusalén, ña nákaa chí induú, ko nákaa ta'an vaan tixi ndá'a ley. Ta ñoo ñóó kúú táto'on naná yo, na kúú kuendá Jesús. ²⁷ Dá chí di'a kaá tuti ij Ndios:

Kadij iní yo'ó, ñá'a, yo'ó ña ko kuú kandeí de'e, yo'ó, ña ko óon ta'on kaki de'e.

Kayu'ú yo'ó xí'an kádij inóon, chí ko ñá'a ndo'o naní níyo, dá kaki iin de'ón.

Dá chí kua'a cháá ka kakuu de'e yo'ó,

ñá ni kandoo nda'í xaan,
o duú na ñá'a ío yíi.

²⁸ Ta viti, ñani miíi, kúu yó táto'on Isaac, chi kúu yó de'e ni kaa Ndios ki'o na noo Abraham. ²⁹ Ni sa kendava'a tayii ni kaki xí'in ña kóni míi Abraham xí'in tayii ni kaki ni kee Espíritu i. Ta ki'o dión ta'ani kéndava'a na ñó'o tixi ndá'a ley xí'in yó viti. ³⁰ Tído, ¿a ko ndúsa ta'on ini ndo ña ká'an tuti i Ndios? Chi di'a va kaáan: “Taó xoo ñá'a nákaa tixi ndá'a ñadi'oon ná ko'an xí'in de'an. Dá chi o kúu ta'on ni'i nduú xi ña va'a xí'in de'e ñá'a dándáki mií.”

³¹ Sa'á ñoo, ñani miíi, kana'á ndó ña ko kúu ta'on yó de'e ñá'a nákaa tixi ndá'a iin ka na. Di'a kúu yó de'e ñá'a dándáki mií.

Ko ñó'o ka yo tixi ndá'a ley Moisés

5 ¹ Sa'á ñoo kandita toon ndó xí'in ña ni kee Cristo sa'a ndo, chi ni taó xoo na ndo'ó tixi ndá'a ley Moisés, ña sa dándáki ñaá. Ta o sa nándió kuéi ka ndo kaño'o ndó tixi ndá'an, dá dándáki tukuan ndo'ó. ² Kueídó'o va'a ndó, chi yu'u kúu Pablo, na ká'an xí'in ndó. Tá ná naki'o ndó mií ndó ña ta'anda ñii ndo táto'on ki'o kée ta Israel, dá kían ko ta'ón ña'a natiin ndó noo ña ni kee Cristo Jesús sa'a yo. ³ Ta nándió koo tukui ká'in xí'in ndidaá taa, tá'an ra kándía ña ta'anda ñii rá, ña miían ndúsa kánian kee ra ndi ndi'i choon sa'ándá ley Moisés, dá kandoo vii rá noo Ndios.

⁴ Tá ká'an ndó ña kandoo vii ndo noo Ndios sa'á ña kée ndó choon sa'ándá ley, dá kían ña yó'o kóni kaa ña ni taó xoo va ndó mií ndó noo Jesús, ta ni taó xoo ta'ani ndó mií ndó noo ña maní ni kee na sa'a ndo.

⁵ Tído sa'á ña ío Espíritu i Ndios xí'in yó, sa'á ñoo ío tandeé iní noo yo ña kandoo vii yo noo Ndios sa'á ña kándéé iní yo Jesús. ⁶ Dá chi sa'á ña kándéé iní yo Cristo Jesús, sa'á ñoo va'ará ni ta'anda ñii yo o ko ní ta'anda ña, ni iian ko ndáya'i. Ña ndáya'i kían kándéé iní yo Jesús, ta ña yó'o kedaá xí'in yó, dá ku'u ini sa'a sátá'an yó.

⁷ Ta sa va'a nda'o kua'an ndo xí'in ña ndaa kándisa yó. ¿Ndá yoo ni nadaká ñaxintóni ndo, dá ko seídó'o ka ndo ña ndaa? ⁸ Tído kana'á ndó ña o duú Ndios ní nadaká ñaxintóni ndo, chi di'a mií ná kúu na ni kana ndo'ó. ⁹ Ta sa ná'a va'a mií ndó ña xí'in lú'u chí'í vá levadura, ta kúu dákuita tachí vaan iin tu'u yúsa káva'a pan. Ta dión ta'ani kée ña to'ón dána'a taa ñoo xí'in ndó. ¹⁰ Ta kándéé iní yu'u sato'o yo Ndios ña nándió kuéi ndó kandisa ndó táto'on ki'o kándisa yu'u. Chi ñayuu katoó nadaká ñaxintóni ndo, miían ndaa chiya'i na noo Ndios sa'á ña to'ón dána'a na noo ndo. Ko né'e tandíni ndá yoo kúu ná.

¹¹ Ñani miíi, tá dána'a íi yu'u noo ñayuu ña miían kánian ta'anda ñii ná to'on kée ra Israel, dá kían, ¿ndiva'a kéndava'a íi ra Israel xí'in yu'u, tá dáa? Chi tá dána'i dión noo ná, dá kían o kuído ta'on ini ra kee to'on va'a ña ká'an sa'á ña ni kee Jesús sa'a yo ndika cruz, tá dáa. ¹² Tído

va'a cháa kaan iin íchi di'a ná dákuáchi taa nádaká ñaxintóni ndo ñii mií rá!

¹³ Kana'á ndó, ñani miíi, ña sa ni nakana va Ndios ndo'ó ña o káño'o ka ndo tixi ndá'a ley. Tído ná dá'a ni ka'án ndó ña sa'á ña ko ñó'o ka ndo tixi ndá'a ley, sa'á ñoó kuu kee ndó ña kóni ñii ndo. Di'a kánian chindeé tá'an ndó xí'an kú'u ini sa'a sátá'an ndó. ¹⁴ Chi dáxinkoo ndi'i yó choon sa'ándá ley Moisés tá ná kueídó'o yó choon kua'an di'a: “Kui'ini ndo sa'a ñayuu xi'ín ndó táto'on ki'o ndó'o ndó xí'ín mií ndó.”

¹⁵ Tído tá chídáó tá'an ndó xí'ín to'on ká'an ndo, ta seí yi'í tá'an ndó, dá kían kaon koo ndó, chi kasandaá kuu, dá naá ndi'i iin rá iin ndó.

Ki'o ndó mií ndó noo na kúú Espíritu ii Ndios ña ná kandaka na ndo'ó

¹⁶ Ta ká'an ta'anii xí'ín ndó ña koo ini ndo kee ndó ña kóni na kúú Espíritu ii Ndios, ta o sa kée ndó ña kini kóni ñii ndo. ¹⁷ Dá chi ña kóni ñii ndo ko náki'in tá'an nóóan xí'ín ña kóni Espíritu ii Ndios, chi naá tá'an va ña kóni ñii ndo xí'ín ña kóni Espíritu ii. Sa'á ñoó o kúu kee ndó ña kóni ndo. ¹⁸ Tído tá naki'o ndó mií ndó noo Espíritu ii Ndios ña ndaka na ndo'ó, dá kían ko ñó'o ka ndo tixi ndá'a ley.

¹⁹ Ta ko ú'u ta'on kandaá ini ndi kée ñayuu xí'o mií noó ña kóni ñii ná, dá chi kée na kuachi xí'ín na ko kúú ñadi'í na o yíi ná, ta kée na ña ka'an noo xí'ín ñii ná, ta ko chítuu ini na kee na ña ka'an noo. ²⁰ Ta ndáño'o na ña ko kúú ndios, ta kétadí na xí'ín ñayuu, ta xiní u'u tá'an na, ta naá na xí'ín dao ka ñayuu, ta kuión na, ta yachi xido ini na, ta sava'a sa'a mií vá ná nákanini ini na, ta sa'ándá tá'an na ñayuu, ta taó xoo na ñayuu kandoo xoo mií ná, ²¹ ta u'u ini na, ta sa'ání na ndii, ta daá xini na, ta tein víko yá'a na kée na ña kini ka'an noo. Ta kée na dao ka ña'a kini táto'on kua'an ña yó'o. Sa ni ka'in xí'ín ndó, ta ká'an tukui ña ndi ndáa miíó ñayuu ndéi kée ña yó'o, ni iin kuu ta'ón o koni na natiin na kande na noó dándáki Ndios.

²² Tído di'a kua'an ña va'a xí'o na kúú Espíritu ii Ndios ña kían kee yó: kú'u ini yo sa'á ñayuu xi'ín yó, ta ió dii ini yo, ta va'a ndéi yó xí'ín dao ka na, ta kueé ini yo, ta kéva'a yó xí'ín ndi ndáa mií vá ñayuu, ta va'a ini yo xí'ín dao ka na, ta kúú yó ñayuu ndaa, ²³ ta nda'í ió ini yo, ta chítuu ini kee yó ña kini. Ta noo ni iin tó'ón ley ko yá'a yó tá kée yó ndidaá ña va'a yó'o. ²⁴ Ta na ndíta xí'ín Cristo, noón kúú na ni chirkuéi ndidaá kúú ña kini kóni ñii ná keean ndika cruz, chi ko kée ka na ña kini kóni ñii ná. ²⁵ Tá dándáki na kúú Espíritu ii níyo yo, dá kían ná kee yó ña kóni mií ná. ²⁶ Ta ná dá'a ni kakuu yó ñayuu ió táyíi ini. Ná dá'a ni dáta'an tá'an yó. Ná dá'a ni koo u'u ini yo koni yo ñani yo.

Koo ini ndo chindeé tá'an ndó xí'ín iin rá iin mií ndó

6 ¹ Ñani miíi, tá iin ndakána ni natiin ndó iin ñani yo noó kuachi, dá kían ndo'ó, na ndíta toon xí'ín Espíritu ii, kúú na kánian chindeé

ná, dá ná kuiin ndaā tuku na. Ta nda'í ni ka'an ndō xí'ín ná, ta kandaā ndō mií ndó, chí oon ni ví kuei ta'ani mií ndó noó̄ kuachi táto'on k̄i'ō ni ndo'ō ñani yo. ² Ta chindeé tá'an ndó xí'ín iin rá iin ndó tá ndó'ō nío ndō, ta k̄i'ō dión kee ndó, dá kee ndó choon ni sa'anda Cristo. ³ Ta na chínaní mií ñā kúú ná na ndáya'i, ta ni iin ña'ā k̄ō kúú ná, dá kían dándá'í na mií vá ná. ⁴ Ta iin rá iin mií vá ndó kánian kande'é va'ā ñā kée ndó, dá kían nata'an ini ndō sa'á ñā va'ā kée ndó. Ta ō sā chídáó tá'an ndó ñā kée ndó xí'ín dao kā ñayuu. ⁵ Dá chí iin rá iin mií vá ndó xí'ín choon ni ni'ī ndō noō Ndios.

⁶ Ta ndidaá ndo'ó, nā dákuá'ā to'on Ndios, kánian chindeé ndó na dána'ā noō ndō xí'ín ñā va'ā ió noō ndō.

⁷ O sā kóo ini ndō dándá'í ndō mií ndó, dá chí k̄ō iin ta'on kuu dándá'í Ndios, chí ndidaá ña'ā xíti ndó, ñoó̄ kían dákée ndó. ⁸ Ta dión ta'ani ndo'ō nā kée ñā kónī ñī ná, noón kúú nā ni'í ñā naá ná. Tído nā kée ñā kónī Espíritu ī, noón kúú nā ni'í ñā kataki chíchí ná kee Espíritu ī.

⁹ Ta ná dá'ā ni kuitá yō kee yó ñā va'ā, chí tá k̄ō sá tuu yó ñā kée yóan, dá kían kasandaá iin kuu natiin yó ñā va'ā noō Ndios. ¹⁰ Sa'á ñoó̄ tá nónó yó kee yó ñā va'ā, dá kían ná kee yóan xí'ín ndidaá ñayuu. Ta ná ndi'ī cháā kā ini yō kee yó ñā va'ā xí'ín nā kándisa dáó xí'ín yó Jesús.

Ta viti kúú yó ñayuu saá sa'á ñā kándéé iní yō Jesús

¹¹ Kande'é ndó, di'ā ví ná'ano letra táai xí'ín ndá'ā mií. ¹² Ta ndidaá rā kónī kandoō va'ā noō dao kā ñayuu, roón kúú rā kéndusā xí'ín ndó ñā ta'andā ñī ndō. Chí sa'á ñā k̄ō kónī rā ñā kendava'ā nā Israel xí'ín rá, sa'á ñoó̄ kénoō rā ñā nī kee Cristo sa'ā yō ndika cruz. ¹³ Tído ni mií rā ni ta'andā ñī k̄ō kándéé kee ndidaá choon sa'ándá ley. Tído kónī rā kéndusā rā xí'ín ndó ñā ta'andā ñī ndō, dá chindaya'i rā mií rá noó̄ nā Israel. ¹⁴ Tído ni lú'ū k̄ō kónī yu'ū chindaya'i mií sa'á ñā yó'ō. Ñā kéká'ano yu'ū kúú ñā nī kee sato'ō yō Jesucristo sa'í ndika cruz. Chí kée yu'ū kuendá ñā sā nī xi'ī ñā kini ió ñayuú yó'ō nooí ndika cruz táto'on k̄i'ō ni xi'ī ta'ani mií noó̄ ñā kini ió ñayuú yó'ō. ¹⁵ Dá chí sa'á ñā ndíta yó xí'ín Jesús, sa'á ñoó̄ ni iin ña'ā k̄ō ndáya'i ñā ta'andā ñī yō ō koó̄. Ñā ndáya'i noō Ndios kúú ñā nī nduu yó ñayuu saá. ¹⁶ Ta ndidaá ndo'ó, nā taxi va'ā choon nī taai noō tuti yó'ō, ná koo va'ā ini ndō, ta ná ku'ū ini Ndios sa'ā ndidaá kúú ndo'ó, nā ndisa kúú nā ñoō Ndios.

¹⁷ Ta yó'ō chí noō ō sā dáta'an̄ kā ni iin ndó yu'ū, dá chí sā kuá'ā nda'ō yanda tándaā ñī kée ñayuu sa'á ñā dána'i sa'ā sato'ō yō Jesús.

¹⁸ Ñani mií, ná koo ñā maní xí'ō sato'ō yō Jesucristo xí'ín iin rá iin ndo'ó. Dión ná koo.